

冷

廬

雜

識

冷廬雜識卷六目錄

顧兼塘詩

姚姬傳比部詩

朱立齋詩詞

小本書

姚文僖公

功在怨磨

鉤隱

葉馨陔先生

塵史

玩好不可溺

明史

詩酒券

圖作佛圖

桐鄉

水龍

葛壯節公詩

劉園

四代同堂

父爲部民

璞玉之喻

疊字詞

齊少宗伯

活人種竹

班馬異同

陳太僕

禽言

烏爾古祭酒

三殿五城

聊齋誌異

宋四六

未婚守貞

箴

朱莊

詠史詩

不繫園

葬會

陳殿撰詩

著述當自定

齋號

昭君詩

玉泉雪水

器銘

周文忠公

沈又希先生

錢景顏先生

吳小宋大令

武昌府署聯

疏用嗚呼語

金元玉

海忠介公

水仙

猴經

傳臚

汪太史

魯雲崖大令

皇甫養亭先生詩

西湖

羅漢像

童二樹畫梅

孟子外書

百家唐詩夷堅志

明倫堂聯

小山詞鈔

飯飯錄

藕湖泛月圖

賦重發端

漢唐

宋石經

浙閩號舍

三字經

任昭才

教子

戴石屏詩

從祀

逸民列傳

明代縣令

王節愍公

屠太守

集字聯

明季大臣

四書逸箋

小詞長調

彭澤父

歐陽公七律

夜紡授經圖

西湖秋柳詞

明登科錄

鴛水聯吟

弔腳痧

蔡沆霞先生

羊車

浙西要害

冷廬雜識卷六

桐鄉 陸以湑 敬安

顧兼塘詩

無錫顧兼塘明府翰宰涇縣有恩廉潔自矢後虧帑項
被劾邑民醵錢代償力拒之曰吾甯獲譴不忍累吾民
也旣遣戍怡然就道著有拜石山房詩鈔道出松陵絕
句云短笛吹殘倚柁樓此身只合伴浮鷗蘆花也有江
湖恨一夜秋風已白頭饒有風致斷句如夏日田園云
綠楊陰下縑車響紫楝風中煮餅香臥病云夢中得句

全篇少枕上懷人遠道多皆可諷誦

姚姬傳比部詩

姚姬傳比部以古文名天下詩亦清俊可誦如地擁江
聲出天橫雨勢來雨歇羣山響春深萬木齊石壁淩江
閣風林隔浦船俱佳姚與趙雲松觀察皆於嘉慶庚午
重赴鹿鳴宴趙繪爲圖姚題詩云敢道與君成二老與
逢此會亦千秋語亦婉妙

朱立齋詩詞

長興朱立齋紫貴司訓杭州詩名隆起嘗於溫州道中

得句云沿街墻比竹籬短貼水橋如板棹低惟親歷其
境者始知其佳又有諸將擬杜詩云元戎寵冠百僚班
共盼膚功指顧間綏帶輕裘羊太傅圍碁賭墅謝東山
馬馱殘月宵移帳旂捲清風曉渡關隊隊銀刀人簇擁
錯疑新破蔡州還潛師宵濟費安排誰遣多魚漏洩來
爛額焦頭新鬼大短兵狹巷幾人回豈容小醜成堅壁
敢向危時議將才赤手長鯨疇縛取至今燐火有餘哀
寂寂蘭陵破陣歌運籌借箸定如何空將併命憐盱眙
終冀安邊有牧頗犄角先同猿鶴化蒼黃轉恨兕犀多

伏波橫海登壇久肯向雷池一步過翁洲消息斷經年
島嶼波濤路渺然風利爭傳黃蓋艦火攻競報李苗船
果能志奮中流楫自可功書幕府箋烽燧未消憂水旱
何人籌及大農錢雪花消後杏花紅誰掣鯨魚駭浪中
鼠目顰頭膺上賞雞鳴狗盜奏奇功親賢授鉞風雲壯
巴蜀飛符士馬雄不有捷書馳海甸諸公何以答宸
衷詩蓋成於暎夷陷甯波之後旨深語警獨出冠時詞
亦清俊錄二首買陂塘

天寒歲暮鄉思無端陳君筱初
同此清況譜是調奉柬丁酉歲

不盡九日書
於安陽學舍

詞云甚無端水程山驛天涯偏又萍寄浮

雲富貴非吾願何況一官飽榮疏懶意也不擬飄零湖
海求知已閒愁喚起正落葉堆門殘蕉風隔風雨響窗
紙同心侶却有哦松隱吏誰憐家世蕭鐫青袍十載
蕭騷感髮鬚寒蘊滋味春及矣只願逐賓鴻北向成歸
計欄杆自倚筭最是無情桃花峻嶺鄉路隔千里臺城
路高大橋仙將赴南溪縣尉之任出楓江話別同索題述此解時已亥立夏後二日也詞云大江
東下君西上天涯又紫離思酒載吳船詩編蜀道三峽
啼猿聲裏清時宦味儘官閒看山了無塵事出水平橋
最憐揮手舊珂里芙蓉塘畔甲第記林泉選勝容與

文史夜雨連床

謂令弟帶
堂觀察

春風進艇我亦曾陪裙屐零

襟斷袂有如雪楊花替人垂淚待話相思綠波傳素鯉

小本書

小本挾書始於宋時見戴埴鼠璞近時坊間所刊尤多
且多訛字道光庚戌年考試教習詩題山雨欲來風滿
樓得陽字乃許渾咸陽城東樓詩句也小本書刊咸作
戊沿其訛而被黜者百餘人

姚文僖公

姚文僖公官內閣中書時常至閣取歷科狀元殿試卷

觀之日必書卷一本嘉慶己未科大魁天下論者謂

殿試卷字爲

本朝狀元之冠公秉性剛正嘗以事忤某協揆意 殿
試時某適閱卷匿其卷他處仁和孫補山相國士穀覓
得之必欲置之前列謂此卷寫作俱佳擯之何以服人
某不得已改置第九本進呈

御覽特拔第一此固由於天定而相國憐才之意亦可

感也公時藝絕高初爲廣東主試

嘉慶庚申

所取文皆古淡

通榜無人登第繼爲福建主試

辛酉

乃降格取之遂有登

第者後爲山東主試丁卯皆取才氣發皇之作登第者獨多自謂取士後盛於前取文則前勝於後常以爲憾

功在怨磨

明夏尚書原吉治水吳中民初不便詢諸父老父老對曰相公開河功多怨多千載之後功在怨磨公斷而行之功施到今

本朝黎襄勤公世序治南河用碎石槩恭勤公毓美治

東河用埽

南河有石可採東河無石故以埽代

皆爲衆議所撓兩公毅然

行之遂以成功予謂凡舉非常之事鮮不致怨惟有大

識力者乃能堅忍持之然必有千載之利始可排羣議以成大功若利不能及久遠而亦強民力爲之則悖矣

鉤厯

折獄龜鑑鉤厯門載王恭戍邊留犒牛六頭於舅李璉家養五年產犢三十頭恭還索牛舅曰犒牛二頭已死當還四頭老犒餘非汝牛所生恭訴於縣縣令裴子雲以恭付獄追盜牛賊李璉璉皇怖而至叱責曰賊引汝同盜牛三十頭藏汝莊內璉不服喚賊對辭乃以布衫蒙頭立南墻下璉急吐欬云三十頭牛是外甥犒牛所

生非盜得也子雲令除蒸頭布衫璉驚曰此是外甥子
雲曰是卽還牛更欲何語復謂璉曰五年養牛辛苦特
與五頭餘並還蒸聞者歎服又載江陰令趙和唐闕史作趙宏
咸通初審問淮陰民隱諱東鄰贖契錢事東陽令侯臨
追還他邑民寄姻家財產事皆相類又金史移剌幹里
朶傳云有農民避賊入保郡城以錢三十千寄鄰家賊
平索之鄰人不與訴於縣縣官以無契卻之乃訴於州
幹里朶陽怒械繫之捕其鄰人詰之曰汝鄰人坐劫殺
人指汝同盜鄰人大懼始自陳有欺錢之隙乃責歸錢

而釋之其事亦相類近世良吏仿此而著循聲者不可勝數亦有與此相反而蒙誦者余戚江蘇田某以二千金予張某賄絲張不與絲而匿其金田訴之郡邑吏不得直乃控之大府大府以無券不允且加責焉田發恨死此咸豐四年事也

葉馨陔先生

同邑明經葉馨陔先生綏祖學識淵通兼達世故里有爭競者以數語解紛皆屈服嗜酒喜交遊每當良辰令節招集朋好酣飲忘疲恒出新意爲觴政以娛賓入其

座者輒流連不能去家素封以是申落晚歲授徒自給
心緒鬱抑年未及六十而卒其自輓云半生豪氣銷杯
酒垂老愁懷託硯田蓋紀實也先生於余爲父輩姻且
比隣而居幼嘗侍談讌記其酒令數則一字三筆而四
子書中祇一見者个若有一勺一勺弋弋不古錢四字个臣之多射宿

備四聲者大泉五十永通萬國天福鎮寶正德通寶二
物並稱有奇耦之分者冠履欵環領袖杯箸扁對成語
三字疊韻者典淡顯輕清靈敏透瘦手柳酒古人姓名
三字同一韻者田延年高敖曹王方慶劉幽求一字分

兩字而三字同在一韻者虹螭麒麟仲媛情

塵史

王彥輔塵史謂詩多識鳥獸草木之名者也然花不及
杏果不及梨橘草不及蕙木不及槐易之象近取諸身
爻辭說卦罔不該矣而獨不言眉與頤以余觀之若花
之桂棘鞠果之淺艾草之蘼芷葱蒜苔木之楓柑等詩
皆未之見至易所不載者如蠶脣眉乳臍等亦未可悉
數又爾雅釋鳥不及鶴釋蟲不及蝶物類至繁偶有遺
焉無足異也

玩好不可溺

王思質忤貽嚴世蕃以清明上河圖贗本世蕃恨其有意給已假失機事致之死程季白寶愛將樂石構一軒藏之董思白爲題曰樂雪齋後官中翰爲權貴邀取不與買禍以死玩好之不可溺也豈獨珠玉寶賄爲然哉

明史

王尚書鴻緒明史彙三百十卷明史定爲三百三十二卷并目錄四卷爲三百三十六卷本紀建文帝改稱惠帝列傳據元史裕宗睿宗之例改稱懿文太子爲興宗

孝康皇帝與獻皇帝爲容宗興獻皇帝別爲一卷表摺
功臣外戚列傳增闕黨周延儒溫體仁改入姦臣列傳
本紀列傳俱增贊語其餘各有增減改易總其成者大
學士張廷玉也謹案康熙十八年

詔修明史 召試彭孫遒等五十人 入館纂修以紀
載互異考覈未定尚書奉

勅纂修於雍正元年癸亥進呈二年

詔諸臣續藏其事乾隆四年七月二十五日明史始告
成先後閱六十餘年視前代之尅期訖事掛漏外誤者

相判天淵洵足爲一朝之信史也

詩酒券

太倉王蓬心太守宸以畫作支酒票嘉善黃霽青觀察
安濤因求題圖詩者之多仿而行之凡索詩須以酒將
意名詩酒券作歌紀之有彼以酒來我詩去一紙公然
作憑據之句

圖作佛圖

徐阮隣師宦成解組以平生所歷之境繪圖三十四幅
各以四字標題首頁曰圖作佛圖自題贊曰忽夢忽覺

獨來獨往海濶天空水流花放萬里行脚十年折腰青
山鶴怨白髮蟲雕梯仙無技博鬼無力視此牟尼卽心
卽佛

桐鄉

桐鄉由崇德分縣始自明宣德五年其名甚古漢河東
郡聞喜邑舊名桐鄉今爲聞喜縣屬山西絳州廬江郡
舒有桐鄉朱邑爲吏卽此地今爲舒城縣屬安徽廬州
府

水龍

救火之器古惟水袋唧筒順治初上海縣唐氏得水龍之製於倭人久而他處漸傳其製其行於天津縣者法尤善城內外置水龍四十八各隸以二百人人皆土著按期練習武力無事仍安常業有事則一呼畢至蓋卽寓兵於此而使之可守可戰遠勝於召募流民以捍衛者矣

葛壯節公詩

葛壯節公績學能詩不愧儒將佳句如游趙氏園云生機三徑草風味半床書夜登金山云鶴鳴山月悄蘿吼

海天空商山遇雨云水聲歸壑健雨氣入林昏又登第
詩云事業人皆爭一第功名我自勵千秋異日致命遂
志此語已爲之兆矣

劉園

湖北武昌府城內劉園乃明故藩遺址在將臺驛之東
北因山而構建於乾隆癸丑歲吳白華學使題曰靄園
通州劉純齋太守錫嘏爲作記并題聯云挹朝爽西來
杯底嵐光飛隔岸望大江東去簷前帆影度遙空園第
一門西向內僻地數畝皆繚以垣有祠祀花神題聯云

五百年爲園主人高臺曲池點綴江城如畫裏十二月
催花使者和風甘雨氣氤香國得春多北有茶社榜曰
來鶴遊人於此小憩第二門東北隅南向內有梅苔鶴
露山房小天台白華亭諸勝俱在東偏向西小天台之
西有佳山草堂向南可望江景入第三門一小徑東有
吸江春草二亭徑盡有堂三楹向東顏曰一池秋水半
房山堂東有池池東有樹樹陰環繞涼意襲人於此避
暑最佳堂之北卽主人內室園不宏敞而幽邃靜逸翛
然塵外洵爲鄂州勝地丁酉歲余屢游焉曾題詩云一

徑穿雲入樓臺深碧虛人爲盤谷隱地是輞川居舊作
藩王宅今成處士廬不勝懷古意憑眺重踟躇莫負山
林勝幽踪且暫淹江聲走虛壁嵐氣逼深簷古砌蟠藤
曲疏籬引蔓纖好詩捫石賞寫景韻重拈

吳白華學使
有詩刻石

四代同堂

道光丁未科庶吉士伍肇齡四川邛州人年十七曾祖
時格祖琨父榮光皆存四代同堂一時傳爲盛事

父爲部民

歸安張蘭渚侍郎師誠撫閩時兼攝閩浙總督事其封

翁在家親故往賀翁曰我不意作兒子部民君何賀耶
聞者傳爲佳話

璞玉之喻

孟子璞玉之喻蓋本左傳製錦數語戰國策王斗之言
尺穀魏牟之言尺帛趙客之言買馬其命意略同而遣
辭各異可悟文法之變

疊字詞

李易安詞尋尋覓覓冷冷清清悽悽慘慘戚戚
效之作天淨沙詞云鶯鶯燕燕春春花花柳柳真真事

事風風韻韻嬌嬌嫩嫩停停當當人人墨字又增其半
然不若李之自然妥帖大抵前人傑出之作後人學之
鮮有能並美者

齊少宗伯

天台齊息園少宗伯召南山制科起家乾隆癸亥
御試翰詹諸臣題爲竹泉春雨賦人皆不知爲

御書宗伯作獨稱

旨特取一等一名擢閣學其賦

天語褒獎卽寫入

御筆畫卷之後裝潢成軸宗伯因賦詩紀恩云賦比
相如定不如卻登玉軸五雲書武皇縱歎凌雲筆祇
聽傍人誦子虛宗伯之從兄周華性怪詭爲逆犯呂留
良訟寃錮刑部獄數年乾隆元年恩赦出至湖北爲
道士子某迹至武當山迎之歸年逾六十乖僻如故自
作詩文署地輿字隱以配呂之天蓋樓宗伯戒之不聽
會熊中丞至台周華突出獻書有狂悖語劾奏置周華
極典宗伯坐是落職

活人種竹

明嘉善孫賢良詢善岐黃術醫痊不受酬贈惟種竹一枝於宅傍久之成林自題詩有活人種竹不種杏之句雅韻高風未易求之近世

班馬異同

元和蔡鐵耕雲癸談六卷詳稽錢制源流其論馬班異同最精謂平準書云令縣官銷半兩錢更鑄三銖錢文如其重又云銅錢議曰半兩重如其文曰鑄三銖文既言其重矣故曰文如其重曰議曰半兩既言其文矣故曰重如其文史公一字不苟若此漢書概作重如其文

便有不可通者馬班優劣卽此可定

陳太僕

陳勾山太僕文章德業爲世儒宗典試分校所得士皆天下英俊其典湖北試也書榜畢監臨范中丞燦謂公曰楚有諺云若要好看黃孝今黃岡孝感中式人多衆所膺服後所取士張夢陽等五十三人登甲榜者十之六七是科落卷公一一別其純疵明白批示發卷後下第士子多來求見公指以要領各得其意以去有劉龍光者聞公講論感激欣喜至於泣下次科聯捷成進士

歷官御史終其身執弟子禮公嘗賦書榜詩曰千枝烟
樺欲燒空淡墨先題後押紅要好由來有黃孝校尤適
得五人同

前五名皆黃岡孝感縣人

禽言

黃霽青觀察禽言詩引謂江南春夏之交有鳥繞村飛
鳴其音若家家看火又若割麥插禾江以北則曰淮上
好過山左人名之曰短募把鋤常山道中又稱之曰沙
糖麥裏實同一鳥也余按此鳥卽布穀爾雅所謂鷓鴣
鷓鴣者是也本草釋名又有阿公阿婆脫却布袴等音

陳造布穀吟序謂人以布穀爲催耕其聲曰脫了潑袴
淮農傳其言云郭嫂打婆浙人解云一百八箇者以意
測之云云吾鄉蠶事方興聞此鳥之聲以爲扎山看火
迫蠶事畢則以爲家家好過蓋不待易地而其音且因
時變易矣

烏爾吉祭酒

蒙古烏爾吉氏時帆祭酒文譽卓著尤好獎掖後進壇
坵之盛幾與袁隨園埒而品望則過之幼聰穎七歲時
塾師以馬齒菜命屬對以雞冠花應乾隆己亥庚子鄉

會試連捷成進士改庶吉士散館授檢討官終庶子敷
歷清華閱二十餘年未嘗與直省學政及鄉會典試分
校之役兩試翰詹並以三等左遷蓋祭酒雄於文而楷
法不逮故每試皆以此見絀初名運昌乾隆五十年遷
庶子時

命改名法式善法式善者

國語龜勉上進也

三殿五城

唐麟德殿有三面故稱三殿亦曰三院今京都五城兼

中東西南北而言蓋卽此義

聊齋志異

蒲氏松齡聊齋志異流播海內幾於家有其書相傳漁
洋山人愛重此書欲以五百金購之不能得此說不足
信蒲氏書固雅令然其描繪狐鬼多屬寓言荒幻浮華
奚裨後學視漁洋所著香祖筆記居易錄等書足以扶
翼風雅增益見聞者體裁迥殊而謂漁洋乃欲假以傳
耶

彭文勤公有宋四六選一書又採諸家書爲宋四六話
名篇傑句美不勝書茲錄其爲時傳誦者鄧溫伯立哲
宗爲皇太子制首曰父子一體也惟立長可以圖萬世
之安國家大器也惟建儲可以系四海之望末云離明
震長縣帝祚於億年解吉渙享麗天人於萬宇景嚴
孝宗受禪赦文云凡今者發政施仁之目皆得之間安
視膳之餘樓攻媿光宗內禪詔書云雖喪紀自行於宮
中而禮文難示於天下陳正甫保安赦文云朕寅畏以
保邦嚴恭而事帝雖不明不敏有慙四海望治之心然

無怠無荒未始一毫從已之欲

能寫出帝宗心事

蘇子瞻益州

謝表云天地能覆載之而不能容之於度外父母能生育之而不能出之於死中李伯玉爲侍講誤犯穆陵嫌名上章自劾有旨免罪震卿爲草謝表有曰講學方新聿陳古誼臨文不謹誤觸嫌名凜雷電之震驚倚乾坤之涵育臣若稽虞典舜日重華載考夏書禹稱文命如揭日月不以山川有耳目者皆知豈齒牙之敢及又曰姓所同名所獨旣重犯於嚴威功惟重罪惟輕乃大恢於聖度蕭卿峰登科歲第一人本趙忠定公故事設科

以待草茅士凡豫屬籍挂仕版者當遜避唱名日陞蕭
爲榜首謝啟有云豫飛龍之選淮安論次以當先無汗
馬之勞鄧侯何功而居上

川宗室及
蕭家事

未昏守貞

女子未嫁守貞歸震川以爲非禮作論辨之後儒往往
信其說此一言而有乖名教者也今以諸家之說正之
朱氏彝尊原貞云自昏姻之禮廢而夫婦之道苦民至
有自獻其身者矣蒙之蠱曰見金夫不有躬貞也者後
世之所難雖過於禮焉苟合乎從一之義是則君子之

所深取耳曰古者女未廟見而死不遷於祖不祔於皇姑歸葬於女氏之黨示未成婦也而況其未昏者乎謂之從可乎曰夫婦之道守之以恒而始之以感夫男女異室無異火澤之相睽自將之以行媒之言信之以父母之命委之以禽納之以純帛則猶山澤之通氣其感與之理已深故曰男女睽而其志通也因其所感不以死生異其志乃所謂恒其德也禮女子未許嫁而笄燕則總首許嫁笄而字則爲之纓蓋至嫁而後主人親脫之凡此者明繫屬於人所以養貞一也則從之之義也

武進劉文定公書徐貞女事云歷觀古史所揭獨行卓
行諸傳爲中人以下男子示矜者不誰過情之節豈一
一規撫經訓云乎哉況女子哉仁和趙氏坦書貞女張
素雲事云禮曾子問曰取女有吉日而女死如之何孔
子曰壻齊衰而弔旣葬而除之夫死亦如之注云斬衰
往弔禮經之文如此夫旣葬而除者以其未成昏也斬
衰而往弔者存夫婦之義也其不著明嫁與不嫁者聖
人固不以守義強人亦不禁人弗爲殆欲人之自盡其
道焉耳此聖人之深心也且許嫁之命非出於父母乎

吾知守其初而已吾何容心於其閒也哉

箴

中歲自省深愧言之不能謹行之不能敦學易荒而交
易濫也因作箴以自警言箴云言之甘歟徒累已德言
之直歟或遭憎嫉將擇人以抒誠又患無知人之明哲
人緘口今吾獨石負氣自矜逞才爲能曷由守樸以保
身行箴云百行之善令聞未遽宣一行之惡已蒙厥愆
善惡之幾辨之宜審稍縱卽誤敢不凜凜勿謂善蒙垢
可弛勤脩勿謂惡無損致招悔尤已往難追後來當勉

早夜以思孜孜實踐勵學箴云人無賢愚非學易成理
無精粗惟學乃明譬彼嘉樹本固斯發又如泉流源遠
不竭研嗜宜篤造就乃深古聖敬脩尙惜寸陰矧余小
子敢逸豫以放心噫嘻歲月易逝其肯爲余待耶今茲
不力得勿貽後之悔耶慎交箴云哲人求友必尙乎德
以義以信是當取則衆人得朋恒徇乎私相優相狎慎
勿效之親賢遠佞爲功匪易在持厥守兼擴其智昔者
君子擇交至精結納勿濫切磋有成今予小子奈何不
慎觀人無識應物失正悅不若已咎將日增庶用告誡

尚其敬承

朱莊

杭州湧金門外西湖濱長豐山館俗名曰朱莊朱彥甫
中翰俊別業也臺榭明麗花木幽深中有寒雲樓攬全
湖之勝尤爲登臨佳境荷池數畝花時香氣襲人池旁
有亭曰觚亭中翰自爲之記題於壁其辭曰亭在水木
明瑟軒後軒占山館之勝清流環匝壘石爲山雜時花
木左則重樓相望而右構造此亭戊戌冬落成形半方
有兩角而未名高子高甫名之曰觚余欣然應之曰子

之善爲名實獲我心也觚之始爲酒器與鐘尊斚等異
於宮室曰觚棱其形方而有角蓋峻厲廉隅未嘗不適
於用其或與時俯仰如脂如韋甚或破觚以爲圓觚哉
孤哉汨其真矣觚又兼簡牘之義將與客共登斯亭琴
樽間作可操觚而賦之抑觚之諧聲爲孤予抱西河之
痛有年矣孤影子立與世寡諧荆子之善爲名實獲我
心也夫闢地有亭亭成有名因亭之方有兩角而名有
觚皆物之後起而偶然者也太虛爲室明月爲牖造物
本無盡藏將逍遙乎無何有之鄉廣莫之野與渾沌者

游則亦忘其爲觚矣而何有於此亭也與道光己亥春

正長豐山民自記

詠史詩

南康謝蘊山中丞啟昆詠史七律五百二十六首琢鍊

名貴自成一家句如玉檢封中呼萬歲金童海上引三

山

漢武帝

十載覃思二京賦千秋絕唱四愁篇

張衡

益州

刺史三刀夢建業將軍百丈船

王濬

學道卅年呼宰相

讀書萬卷作神仙

陶宏景

朱三跋扈淒涼詔鄭五平章

歇後詩

唐昭宗

屬劉工切妙合自然正不必以議論見

長吳穀人祭酒爲作序云公事纔閒吟箋已設一燈搖
雨如夢古人萬葉呼風忽來好句恰能寫當時吟趣也
不繫園

明季錢塘汪然明孝廉汝謙嘯傲湖山製一舟名不繫
園題詩云種種塵緣都謝卻老耽一舸水雲間又作不
繫園記其略云自有西湖卽有畫舫武林舊事豔傳至
今其規至種種不可考識矣往見包觀察始創樓船余
家季元繼作洗妝臺玲瓏宏敞差足相敵然別渚幽汀
多爲雙橋壓水鎖之不得入癸亥夏偶得木蘭一本斲

而爲舟長六丈二尺廣五之一入門數武堪貯百壺次
進方丈足布兩席曲藏斗室可供卧吟側掩壁厨俾收
醉墨出轉爲廊廊升爲臺臺上張幔花晨月夕如乘彩
霞而登碧落若遇驚飈蹴浪欹樹平橋則卻欄卷幔猶
然一蜻蜓艇耳中置家僮二三擅紅牙者俾佐黃頭以
司茶酒客來斯舟可以御風可以永夕遠追先輩之風
流近寓太平之清賞陳眉公先生題曰不繫園佳名勝
事傳異日西湖一段佳話豈必壘石鑿沼闢邱壑而私
之曰我園我園也哉黃參議汝亨爲作不繫園約標以

十二宜九忌十二宜云名流高僧知己美人妙香洞簫
琴清歌名茶名酒殺不踰五盤却騶從九忌云殺生雜
賓作勢軒冕苛禮童僕林立俳優作劇鼓吹喧填強借
久借汪又有小艇曰隨喜菴曰觀葉曰小團瓢曰雨絲
風片近日西湖船若半湖春搖碧齋四壁花宜春舫十
丈蓮煙水浮家小天隨等皆堪游憇然如不繫園之有
廊有臺則未之見也

葬會

浙西淹葬之風由來已久

國初德清唐源儒先生



舉親葬社約吾邑張楊園

先生履祥推廣之分八宗宗八人立宗首宗副凡社中
有葬親者宗首副傳之各宗首副彙八宗弔儀人三星
致葬家八宗宗人之子俱會聚卽登社約曰某年月日
某人某親已葬使未葬者惕然以七年爲期過期不葬
者不弔所以示罰也後又增一條八年葬者亦酬其半
以存厚也自後續行者少淹葬之風仍然道光辛丑年
吾里邱雨樵茂才青選復舉葬會糾同志四十人於四
月望日各資錢五百赴會所拈阄以定應得之人卽予

錢二十千爲葬貲如願讓他人先得亦聽其便錢存公所豫備磚灰等物不得攜歸磚瓦等贖自窑所價視肆家特廉歲推二人司其事每歲人各出錢二千給四人葬事費不耗而事可久其法最良倡始於西柵而東南北皆效行之吾里善事孔多此舉爲稱首誠能推而廣之使天下無不葬之親豈不美歟其在窮鄉窶人或以用磚費大則朱子白雲葬法價廉而工堅最宜效法世俗又有以糯米搗和沙灰謂尤堅固可久抑知暴殄天物不可爲訓湖州某方伯歿後棺用沙方木葬用糯米

沙灰迫其曾孫貧而無賴竊發棺售之遺骸暴棄雖其
孽不在用糯米一端未始不因此增罪戾也

陳殿撰詩

蕲水陳秋所殿撰沈工詩時楚有寇氛作詩貽友人云
桃花破屋開殘雪燕子空墳語夕陽時皆傳誦

著述當自定

程篁墩詞章負盛名求其文者多門下士代筆歿後刊
集大半贗入瑕瑜互見呂新吾學業醇篤其集爲後人
所編俳諧筆墨無不具載爲全書果知文人著述必當

及身自定也

齋號

南宋後始有齋號而史傳皆從俗志書繫號始於景定
嚴州志近日錢警石學博海昌備志從之謂數十年來
友朋相呼俱以齋號詩文著作自署亦然若竟略之亦
爲失實然齋號每出已意字則命之親長者多詩文自
署究不當舍置也

昭君詩

詩人之思日出不窮卽如詠昭君者唐宋以來佳篇不

少近代更有翻新制勝者略識所見於此天低海水西

流處獨有琵琶堪喚語斷絲枯木本無情猶勝人心百

千許

胡稱威

君王重信不重色玉貌三千替不得穹廬若

使詔留行金屋歡娛豈終極一傳禍水入後宮燕燕盡

啄皇孫空自謀則過君謀忠畫工毋乃真國工沈一辭

宮闕出秦關長得丹青識舊顏爲報君王休愛惜漢家

征戍幾人還

顏光敏

漢主曾聞殺畫師畫師何足定妍媸

宮中多少如花女不嫁單于君不知

劉廷

遠嫁呼韓豈

素期請行似怨不逢時出宮始覺君恩重臨去猶爲斬

畫師

趙翼

胭脂零落倍銷魂急雪嚴霜泣暗吞敢向琵琶

傳怨語至今青塚亦君恩

那彥成

戰骨填沙草不春封侯

命將漫紛紜當時合把毛延壽畫作麟臺第一勳

許宗彥

無金贈延壽妾自誤平生

沈德潛

玉泉雪水

高宗純皇帝巡蹕所至製銀斗命內侍精量泉水京師
玉泉山之水斗重一兩塞上伊遜之水亦如之其餘諸
水濟南珍珠重逾二釐揚子江金山下中泠重逾三釐
惠山虎跑各重逾四釐平山重逾六釐清涼山白沙虎

邱及西山之碧雲寺各重逾一分遂定玉泉爲第一作
玉泉山天下第一泉記又量雪水較玉泉輕三釐遇佳
雪必收取以松實梅英佛手烹茶謂之三清嘗於 重
華宮集廷臣及 內廷翰林等聯句賦三清茶詩
天章昭煥洵爲

昇平韻事

器銘

器之有銘由來遠矣見於歷朝者不可悉數茲擇近人
所作辭旨簡質者錄之方望溪侍郎硯銘磨而不磷靜

以守黑又澄泥硯銘甄之陶之久益堅琢之磨之好且
完善而藏之德乃全錢竹汀宮詹國硯銘懷孔之璧守
老之黑又筆管銘母用汝銳可以百歲紀文達公截刀
銘當斷則斷以齊不齊利器在手孰得而參差又瓜硯
銘無用者半益之以枝蔓君子厲文鑒於茲硯金冬心
缺角硯銘頭銳且禿不修邊幅腹中有墨君所獨梁山
舟學士自用硯銘磨不磷涅不淄堅白之德吾所師又
小硯銘不彫不琢完爾太璞又摺疊扇銘一闔一闢造
化在手明月半規清風滿袖程易疇學博小員硯銘余

能方弗能員宜與而相周旋吳江周叔斗茂才夢台印
泥盆銘紅泥田玉龍耕種垂腕蜒收令名乃有年孫愈
愚明經筆銘三寸管一丈舌慎持之有鬼責嘉興錢警
石學博泰吉印匣銘保其名在退藏用之不輕終身藏
楊至堂河督硯銘澄不緇蕉葉白知其白守其黑說心
研慮介於石高伯平明經朱硯銘勒六籍文字之益惟
中藏者赤余嘗作筆銘云純兮蕪兮判厥品朱兮墨兮
視所近勤習慎持用無不宜又墨銘云色闇德馨體剛
堅而用文明早夜研摩以成我名

周文忠公

明周文忠公鳳翔遺集七卷其族孫源搜羅散墜於嘉慶癸酉付梓集中論籌兵餉略云摧鋒陷陣則無兵旤巾呼庚癸則多兵殺賊攻城則士不力唾有司背噪擊戕道將則力又云夫此健兒美衣食飽妻孥酣酒肉皆四海之窮民敲骨抽髓鬻男嫁婦以供之者也乃當敵而敵愈猖勦寇而寇益潰甚至調一大將援某地不過以一二千人往而又多浮額一遇大敵縮而自保寇退則割平人級以張功蓋罪擄掠飽颺而入饒吹紛如矣

指陳當時情事切中其弊公召對嘗陳吏速化則治不成民重征則盜不息又嘗論學曰學不可立黨立黨則必爭奚能見道昔朱陸之辯虛心求是也今之辯朱陸私心求勝也言愈多而道愈晦矣論史曰三代而後漢與外戚共天下唐與母后宦官共天下魏晉以下與膏粱子弟共天下宋與奸臣共天下元與宗族共天下趙氏吉士續表忠記備述之稱爲名言公盡節時貽父母書云國君死社稷臣子無不死君上之理况男忝列從臣官居講職乎父母生育教誨以有今日男幸不虧辱

此身貽兩大人羞男事畢矣罔極之恩無以爲報矢之
來生萬祈珍調康茂勿以男爲念日晷已促不得盡言
讀此知當日貳臣有以親在爲解者皆無所逃罪矣

沈又希先生

秀水沈又希先生范係爲文高古不近俗年七十猶應
秋試迄不獲一第嘗誨其孫蓮溪觀察濂曰我困躋極
矣汝兄弟取科名必易雖然所望於汝曹在品學之醇
邃科名尙在所後主平喜爲詩客游四方一時名士皆
推重之尤與山陰章二樹山人鉅相契二樹寫梅花於

雪香齋友人方輅懸諸齋壁時正苦寒百蟲盡蟄忽有一蜂徘徊頓上繞花不去先生作歌紀之有云雪梅畫梅蜂食鬚明劉雪湖畫梅寺壁蜂食其鬚殆盡見王遂東雪湖梅譜序樹翁畫梅蜂繞株遙遙相去二百載淋漓大筆同沾濡凡六疊韻而三樹疊韻至百篇一時傳爲美談

錢景頗先生

嘉興錢景頗先生復由縣丞官至大興縣知縣每舉蘇文忠公遇民如兒吏如奴語而申之曰民果不良亦奴也吏果良亦兒也然大勢吏強而民弱吏黠而民愚故

每事必持以平胥役相與語曰曩者百姓畏吾儕今吾儕反畏百姓矣聽訟必令兩造各言是非於憤爭時伺其隙徐出一言而決嘗曰家人誦許不悉其顛末尙難定曲直況小民見官長多畏憚更加以聲勢使不能言何以聽焉兩造具服卽判牘尾俾堂上審視其不識字者吏朗誦使聞曰稍緩則弊生矣以是所至無留獄先生之子警石學博以文學昌其家孫曾濟美其食報遠矣

吳小宋大令

仁和吳小宋大令章祁以名孝廉宰蜀之蓬溪縣視民
事如家事尤以振文風端士習爲先務嘗曰邑宰於民
最親於士爲尤近接以禮聯以情孚以推誠相與之心
勤以束脩自愛之念未有不樂於爲善者不此之務而
徒咎士風之不醇可乎以故終其任士無干文網者在
官三年以勞瘁卒邑人感其惠建祠奉祀紀以聯曰修
其孝弟忠信可使制梃故曰仁者無敵保我子孫黎民
尙亦有利此以沒世不忘

武昌府署聯

湖北武昌府署聯惟周太守廷綬所撰最佳三十城表
率九郡先驅億萬姓屬目相看刑賞惟求孚衆志廿載
司曹一麾出守二千石仔肩孔鉅清勤不敢負家聲詞
致穩愜可誦

疏用嗚呼語

明史吳廷舉傳巡撫應天諸府改南京工部尙書辭不
拜稱疾乞休帝慰留已復辭且引白居易張詠詩語多
詆諧中復用嗚呼字帝怒以廷舉怨望無人臣禮勒致
仕其疏載集中有云親友勸臣治任每誦白居易月俸

自千官二品朝廷雇我作閒人之詩寮吏止臣辭官輒
舉張詠幸得太平無一事江南閒煞老尙書之句又云
比無官守將近先廬沿途訪藥尋醫已至吳頭楚尾東
湖路近難忘水木之心西廣雲深益動首邱之念罪深
渤海事聞不待報而行身等羈鴻路盡失所歸爲恐鳴
呼零灰久冷焰豈復燃老馬已疲齒無復壯古今一道
也而日暮途遠老病之人又復夜行冥走以餌虎狼之
口以葬萬仞之淵此豈人情所願有哉臣言至此肝膽
畢陳危苦盡露矣夫奏章體宜莊重而疏慢若此其獲

謚也亦宜

金元玉

明上元諸生金元玉琮酷嗜學書寒暑無閒每夜作書以五寸長燭爲度燭盡而止王百穀謂詹仲得趙承旨之皮陸文裕得趙承旨之骨惟元玉能得其髓文徵仲好收元玉書蹟都一篋貯之名曰積玉其爲名流賞重如此可知業未有不勤而後能傳者世之士夫耽生前之逸樂欲冀身後之聲名妄矣

海忠介公

松江府志載降慶初開吳松江久無功及海忠介至吏
請爲行署於江之北岸公素儉樸而命擇所居務深邃
人卒不解詰且略出巡視卽召二千戶一主簿人數其
不職斬之席藁埋廳事後萬衆駭愕并力疏鑿閘月而
畢而三人故無恙發其所埋悉是大豕按明史稱忠介
秉剛勁之性慤直自遂似未必用此權術况以豕易人
豈無人見而能令萬衆駭愕耶疑志所載不實耳

水仙

伍子胥屈原孫思陵峴皆有水仙之稱五代徐鉉老亦

稱水仙杭州西湖又有水仙王祠仙而稱王尤奇

猴經

藥物中有猴經乃牝猴天癸治婦女經閉神效李心衡
金川瑣記云獨松汎之正地溝山高箐密巖洞中猿猱
充仞土人攀懸而上尋取所謂猴經者赴肆貿易多至
百觔此可以補諸家本草之闕

傳臚

往時會試在二月乾隆十年始展限三月以待春溫往
時會試揭曉後例以磨勘需日於五月五日 殿試初

十口傳臚乾隆辛巳年

高宗純皇帝念多士守候時久命速行磨勘更期四月
二十一日 殿試二十五日傳臚此後遂爲定例 殿
試後閱卷大臣擬列甲第名次進呈

欽定於二十四日先拆前十卷按名引 見名曰小傳
臚傳臚之日請進士有不到者小傳臚之日則無敢不
到恐名在十卷中傳宣匆遽不及趨赴而獲咎也

汪太史

錢塘汪韓門太史師韓雍正癸丑進士早歲工詩中年

罷官後一意窮經著述宏富初入詞館習國書賦龍書
五十韻李穆堂學士級見之歎異攜其詩入八旗志書
館館中見者多不知其辭所自出學士曰吾尚有不知
者何況君輩由是名益著茲錄其詩中開十韻竝自註
於此垂訓肇

龍興

天命閒
製清書

承基續奕世自兩文成來

榜式大海額爾
德宜俱諱文成

詞臣所專肄經大義微言史編年紀事各各窮幹枝往
往破疑貳綜博定清文瞭焉實鑑對

清文鑑凡二十一
卷分三十六部二

百八

十類綱領三十餘毛目二百類蟻磨運左旋龍賓呼十

二弩磔形模點圍循位置

清書乃修飾蒙古字而成惟加點與圈與變用捺法

見雍正間

御

纂

庭訓格言

四聲該仄平

萬物括開閉約之宗諧聲

衍之蘊六義太史論詩謂習俗所尚曰輕曰脆曰新曰

巧而余之意則在不輕而重不脆而堅不新而舊不巧

而渾竊謂近人學詩皆沿袁隨園流弊此言可救其失

魯雲崖大令

江西新城魯雲崖大令成龍滋政勤敏暇卽觀史以爲
此有用之學足裨吏治宰懷柔時土瘠人滿旗民雜處
食常不足且多火災乃勸民積穀每二十五里設倉一

所而荒歉有備其救火之法則設爲木籌每火起輒攜至火所令民運水互相救應運水一次給一籌火止繳籌因其多寡而予之錢鄰里不相救者有罰自是懷柔火不能災

皇甫養亭先生詩

同里皇甫養亭先生櫟績學能文兼工吟詠與秋畦公交好嘗自題公詩稿絕句云暈碧裁紅幾幅箋清吟流播五湖船林泉高致詩如畫著色丹青趙大年我亦耽詩讀鄭箋只今般若未登船平生自笑如潘緯古鏡工

夫枉費年

西湖

天下西湖三十有六惟杭州最著福建福州府亦有西湖朱子集中西湖詩云湖光盡處天空濶其起句云越王城下水融融對句云潮信來時海氣通乃閩之西湖也道光戊子年浙闈主司以此句命題蓋誤以爲浙之西湖詩也

羅漢像

西湖雲林寺淨慈寺皆有五百羅漢塑像聖因寺有貫

休十六羅漢像石刻昭慶寺又有象山金貞女繡旛五百羅漢像貞女許字同邑黃氏未嫁而夫卒聞訃奔喪入門守節於事舅撫嗣之外手繡此旛寒暑無閒者十餘年而後成苦心堅操彌足重也

童二樹畫梅

童二樹畫梅少粉本時於月下濡翰縱橫欲側皆成妙畫故所繪無一複者鉛山蔣心餘太史上銓見童畫梅寄以詩云我不識君見君畫每對梅花身下拜幼時友人劉鳳岡夢龍化爲梅二樹因以爲號生平題畫詩往

往奇驗嘗元旦爲周進士世績題畫有第一朝開第一
花之句是年周發解湯容煇有僕僮乞畫藕因題詩曰
具此清淨姿何爲乎泥中僮數日殤

孟子外書

史記謂孟子受業于思之門人風俗通則謂孟子受業
於子思而孟子外書又謂孟子學於子思之子子上此
書乃後人纂輯諸書而成其說有與孟子異者如陳仲
子卒孟子誅之曰吁嗟仲子廉潔以保貞兮求名而得
名兮數齊國之高士舍仲子其誰稱兮惟山高而水流

千古一於陵兮吁嗟仲子名長存兮可慰於九泉兮夫
孟子方以仲子爲烏能廉安肯稱之如此辭亦淺易不
類

百家唐詩夷堅志

王介甫選百家唐詩當時用紙帖出付筆吏吏憚
於謄錄易以四韻或二韻詩王不復再視故所選不皆
佳洪景廬撰夷堅志急於成書妄人多取太平廣記中
事改竄首尾別爲名字以投之徑以入錄致爲後人所
訾甚矣著述不可假手於人也

明倫堂聯

學宮明倫堂聯遂甯張文端公鵬鵬所題最爲堂皇博
大先聖道竝乾坤博也厚也高也明也悠也久也今皇
教同堯舜勞之來之匡之直之輔之翼之

小山詞鈔

朱晏叔原幾道小山詞鈔一卷補鈔一卷其裔孫儀徵
彤甫廉訪端書從

御定歷代詩餘及四庫全書小山詞錄出刊行黃山
谷序稱叔原仕宦連蹇而不能一傍貴人之門是一癡

也論文自有體而不肯一作新進士語此又一癡也費
資千百萬家人饑寒而面有孺子之色此又一癡也是
叔原之爲人正自異於流俗不第以綺語稱矣其長相
思一闕語淺情真尤爲集中別調長相思長相思若問
相思甚了期除非相見時長相思長相思欲把相思說
似誰淺情人不知

餽餼錄

台郡近多古贓宋心芝學博嗜之成癖自吳建衡以下
迄於明搜羅三百餘種編次成集詳爲考證顏曰餽餼

錄馮柳東教授題詩云荒草秋墳世代遙赤城山下晚
蕭蕭殘甎零落千年字一片苔花認六朝遺篆荒涼佛

窟山南朝太尉手書傳

宋曹太尉勳墓碑乃其手書今已出土

永和故事

分明在訪古來尋癸丑甎

台州有永和九年歲癸甎

余亦題其後云

舊萃遺文手自編標題遠溯建衡年從知漢瓦秦碑外

別有千秋翰墨緣墓門荒草碧迢迢劫火沈淪間幾朝

重與品題傳姓氏九原遺恨可應銷宋工書兼精篆刻

曾司訓樂清縣不久卽告歸杜門謝客著書自樂識者

高之

藕湖泛月圖

舅氏家笠澤之藕湖嘉慶丙子迄己卯余從舅氏周履
松先生森游讀書湖上時與諸表兄弟放舟湖中吟賞
忘倦道光甲午表兄周鐵霞舍人士燭繪藕湖泛月圖
屬題塵事牽率未有以應丁酉冬自楚改官歸卜宅於
笠澤東偏距湖三百餘武過從頻數撫景興懷譜金縷
曲以踐前諾云關鴨欄邊路儘詩人烟波嘯傲放懷朝
暮彈指番風催信早一夜紅英徧吐又詠就牽芳新句
畫舫沿流忘遠近看娟娟纖魄遙峯露香霧外曳柔艣

頻年浪迹拋吟侶想姁娥多應笑我抗塵何苦千里
扁舟尋舊約勝地移家小住重領略江鄉佳趣三五涼
輝邀其醉待更闌便宿花深處清夢穩狎鷗鷺

賦重發端

試賦最重發端唐宋人所作流播藝林者如裴晉公鑄
劍戟爲農器賦皇帝嗣位之十三載寰海鏡清方隅砥
平驅域中盡歸力穡示天下不復用兵白香山性習相
遠近賦噫下自人上達君威德以愼立而性由習分韋
豕畫狗馬難爲功賦有丹青二人一則矜能於狗馬一

則誇妙於鬼神李程曰五色賦德動天鑒祥開日華陳
佑平權衡賦俛民不迷茲器維則賈餗蜘蛛賦涼風起
兮秋初步簷宇兮躊躇黃滔秋色賦白帝承乾乾坤悄
然鄭獬圜丘象天賦禮大必簡丘圜自然宋祁王畿千
里賦測主於地考極於天風雨之所交者道里之必均
焉陳元裕大椿八千歲爲春秋賦物數有極椿齡獨長
以歲歷八千之久成春秋二序之常熊元君人成天地
之化賦物產於地形鍾自天賴人君之有作成化工之
未全此類不可悉數近代名作雖未能上追古人其見

稱於世者亦可約舉焉吳祭酒錫麒秋聲賦迴野千里
危樓一角油燈欲昏酒夢初覺起古愁於虛空盪余心
於眇邈并萬族之可憐激寒吹以相撲蔡明經壽昌白
桃花賦竹外水濱春風寫神呼之欲出此中有人趙霖
召伯埭賦路過蕪城當川原靜處以凝望見古埭蕭然
而寄情邵堂蓼花賦白蘋洲外黃葉村邊魚梁淺水古
渡寒天輕陰閣雨遠樹梳煙四圍空闊一派鮮妍蔣念
晉春山如笑賦林嵐景色翰墨神仙山光鏡裏人面春
前韋光黻西山探梅賦餘寒猶峭衆芳未妍關心昨夜

惜別經年東崦西崦之路欲雪未雪之天逗韶光於歲
暮識芳信於春先顧成俊桃花源賦花塢兮沈沈隔紅
塵兮碧岑張炳菊花枕賦積秋一囊緘香萬片睡味能
甘澹格逾綯

漢唐

漢之衰也何進召董卓以速禍唐之衰也肅遣召朱玫
而致亂是以聖人御宇博選輔弼之彥而謀必僉同厚
集宿衛之兵而權必獨攬也

宋石經

宋高宗御書石經今在杭州府學大成門外兩廊壁中
曝書亭集謂左則易二書六詩十有二禮向有學記經
解中庸儒行大學五篇今惟中庸片石右則春秋左氏
傳四十八碑闕其首卷通計八十七碑非足本矣秦檜
一跋吳訥椎碎云云以余考之左易二書七詩十中庸
一論語七孟子十一右春秋左氏傳四十八通計八十
六碑秦檜跋刊在詩經碑尾者尙存楷法迺整宛似思
陵乃其人既遺臭後世則翰墨亦爲儒林所羞稱雖字
畫端好適爲此碑之玷耳

浙闢號舍

吾浙闢中號舍按千字文字排次祥代天翼代羽協代
竭元黃洪荒盈昃火帝人皇弔民伐罪毀傷難量墨悲
作聖空谷禍因惡積君二十九字皆不用東文場祥至

器八十七字

祥字日辰列寒暑秋冬開成律調雲致露
為金麗玉昆劍巨珠夜果李榮芥海河鱗

翼龍鳥始文乃衣推讓有陶周商生問垂平愛黎臣戎
還壹率歸鳴在白食化草賴萬蓋身西五恭鞠豈女貞
男才知必得莫罔西文場地至覆八十六字
彼歷已信可器
藏餘歲片陽騰雨結霜生水出岡號關稱光珍柰重蓋
鹹淡滑筋鮑官制字服裳位國虞唐發湯朝道拱章育
首代差遜龍賓王鳳竹駒場彼木及方此髮大儀門傍
常惟茲敬慕烈效良過改能忘談短恃長使覆

東夾道絲至習十三字

絲詩羔景維克德名形表傳虛習

西夾道欲至

資二十七字

欲染漆羊行賢念建立端正聲堂聽

皆自

北而南至公堂傍西夾道父至溫二十一字

父事口嚴與敬孝當

協力忠則盡命臨深履薄夙興溫

獨自南而北計共二百三十四字共

號舍一萬二千三十間每料應試人數多則一萬二千

餘少則不及一萬以攷錄遺鮮有擯棄者明初棘闈與

杭郡庠相連天順間守臣奏士子屢有作弊改於城東

廢倉地舊用木舍萬厯四十年御史李邦華易以甃永

絕火患號衙向爲泥道嘉慶九年阮文達公爲巡撫整

之以石往時號舍一萬餘間人數多時添設廩號不免風雨漂搖之苦道光初鄧夢白中丞與當道創議捐資擴增千餘間自是士子始咸得所焉

三字經

童蒙所誦三字經相傳爲王伯厚作此流俗之說也周公時無六經之名不當云著六經大小戴禮記乃大小戴所撰不當云註禮記困學紀聞尊蜀而抑魏其所敘述蜀先於魏亦不當云魏蜀吳爭漢鼎經史之大者疏舛若此其他可無論矣

任昭才

阮文達公記任昭才云昭才鄞人善泅海余撫浙治水師時募用之昭才入海底能數時之久數十里之遠余所獲安南大銅礮重二千餘斤兵船載之遭颶沈於溫州三盤海底深二十丈不可起命昭才往圖之昭才用八船分爲二番一番四船空其中一番四船滿載碎石自引八巨繩入海底繫沈船之四隅以四繩末繫四石船爲一番繫既定乃掇其石入第二番之空船是石船變爲空船浮起者數尺矣復以二番四繩之末繫一番

之石船掇石入第一番空船是浮起者又數尺矣如此數十番數日之久船與礮畢升於水面矣余擢昭才爲武弁以病卒於官按宋費衮梁谿漫志云河中府浮梁用鐵牛八維之一牛且數萬斤治平中水暴漲絕梁牽牛歿於河募能出之者真定府僧懷丙以二大舟實土夾牛維之用大木爲權衡狀鉤牛徐去其土舟浮牛出轉運使張燾以聞賜以紫衣昭才之計正與此同其力尤不可及惜遽卒未得顯用於時

教子

明代女子工科舉之文者惟孫忠烈公子文恪公繼室
楊文儷仁和工部員外郎楊應解之女也教子成進士
者四人鑑鑛皆尙書銓侍郎銓太僕卿史載鑑主大計
力杜請謁以言不見用累疏引退卒諡清簡嘗曰大臣
不合惟當引去否則有職業在謹自守足矣鑛爲吏部
考功文選郎澄清銓法掌南樞時鑛使橫出妖人噪衆
爲亂鑛請重典治之遷卒四出給事御史交劾鑛濫殺
鑛乃三疏求去然鑛去妖黨竟蔓延十餘年致煩王師
兄弟之志節經濟卓卓可稱知其稟承母教者不獨在

文章矣

戴石屏詩

戴石屏詩春水渡傍渡夕陽山外山明徐巨源世溥效其體云羈旅客中客亂離身後身蓋易寫景爲寫情也唐僧澹交寫真詩云已是夢中夢更逢身外身以活句作對其體稍異

從祀

朱竹垞太史孔子弟子考著錄九十八人從祀者七十九人從祀崇聖祠者二人顏子無繇曾子點尙有十七

人不在從祀之列薛邦申續申棠公伯寮旅瑀孺悲公罔之裘序黜仲孫何忌仲孫說孔璇惠叔蘭常季子服何賓牟賈鞠語顏涿聚竊謂公伯寮得罪聖門自應見黜此外似當陳請補入

逸民列傳

後漢書逸民列傳野王二老者不知何許人也陶靖節五柳先生傳仿用之北史用此語尤多

明代縣令

盧少樞稱忤縣令蔣某蔣假役夫壓死事捕盧論死破

其家賴謝茂秦入京師曰其冤繫獄十五年得釋馮已
蒼舒以議賊役事觸縣令瞿四達遂以他事羅織下馮
獄未幾死獄中明季縣令威權乃若是

王節愍公

錢塘王節愍公道焜明史附朱大典傳後其詳見於陳
勲所作小傳云乙酉

王師南下子孝廉均勒名仕籍公曰甲申之難余可以
死而不死將有所爲也今家亡國破我父子世受國恩
死且晚矣爾死則尙有老母在我死則汝可以有辭是

我一死而上報君父之恩下全母子之誼復何恨遂自
經死均爲童子時割股以療母公沒事後母色養備至
窮老江鄉終身不仕忠臣孝子一門盛事人猶以爲天
之報施善人何其窮阨如此嗚呼自此論出宜其士氣
喪人心壞士大夫蠅營鼠竊敗名教而頽風俗豈細故
哉陳氏此論不徒爲節愍父子表微且可激勵千古之
人心特誌之

屠太守

杭州屠琴臨太守倬奸蓄奇石有異品三十六枚各置

以名 泰階符 太古雪 紫雲迴 嶺上晴雲 天
風海濤 烟江疊嶂 小劍閣 九疊屏風 一寸樓
臺 玉女窗 壽者相 紫衣定僧 半面鍾馗 漁
丈人 銅仙佩 米家硯山 玉浮圖 珊瑚網 玉
鏡 柘枝舞 擣藥杵 百結連環 青芝 玉井蓮
半段松 丁倒蓮房 束筍 飛龍骨 蠟鳳凰
玉辟邪 霧豹 角鷹 戲鴻 江天一鴈 子母雞
海月 太守自作三十六峰圖同時名流題詠殆編
太守初以縣令居憂甫服闋

特旨授袁州知府不一月調九江越七載病歿蓋居憂時已病寓居維揚竟不能之官嘗有句云頸銜已署五湖長遙領匡廬又一年比歿齊大令彥槐輓以聯云一病負殊恩九派滄江懷太守十年成大覺二分明月弔詩人

集字聯

集字始於東坡之集歸夫來辭近時人多集蘭亭序字作楹帖如室有山林樂人同天地春 惠日朗虛室清風懷古人 日攬九流修向錄情游萬古得彭年 一

人知己亦已足畢世自脩無盡期 室因抱水隨其曲
竹爲觀山不放長 風人所詠託於古靜者之懷和若
春 與世不言人所短臨文期集古之長 得趣在形
骸以外娛懷於天地之初皆得雅人深致三韓馬朗山
觀察慧裕嘗集蘭亭序字聯語成編刊行摘錄於此永
懷當世盛所樂在人和 當大人之事聽賢者所言
坐山林以終日觀天地之大 畢世脩爲嘗在已一生
遇合盡由天 無事在懷爲極樂有長可取不虛生
人品旣爲時所仰下懷嘗與古相期 清品猶蘭虛懷

契竹朗抱若水和氣當春 醫家聯云能脩其事同良
相得過斯人自永年 又摘錄其集洛神十三行字聯
云倡疇交以信詩禮志從先 人無信不足言是心之
聲 言詩明素志抗禮接歡顏 神清悅我志辭達解
人疑 神交以志合心遠爲情牽 長言清以厲素志
遠而超 和其聲以流詠超衆志而爲言 神靈中甫
斯揚烈心遠淵明白解詩 詩禮託先人之蔭嘯詠明
素志而言道州何子貞同年太史紹基集字對句最多
嘗見其集爭坐位帖字聯一冊錄其尤者於左九功惟

敘使勿壞百度得數而有常 宣德道情文乃貴明微
謹始禮爲宗 與其過經何如謹到得能誠自會明
豈願文才過屈宋勤思聖道仰顏曾 明月同行如故
友異書難得比高官 兩足不出門半尺一室坐擁書
百城 行事莫將天理錯立身當與古人爭 聞常言
輒有至理愛別致便非本心 且自思立足何地豈可
輒抗顏爲師 藏異書貴得初本收古畫須檢裂文
有三尺地身可坐到五更時心自清 如張子野真辭伯
是李將軍乃畫師 誠意功夫唯謹獨匡時事業貴知

人時事亦當參古禮人爲不敢恃天功 對月橫安
高士楊論文喜得古人書 縱目古今還自省側身天
地一無言 倫理只從天事見功名貴自本心求 古
易九家皆見聖魯論半部足匡時 然名香宜對古畫
見明月又來故人 書城高大能藏道心地光明始愛
才 時聞其過我尤喜願同此心君莫疑 目未曾見
莫言怪心所不安斯謂危 悟到前身應是月數來益
友莫如書 豈獨安分守身爲事欲作頂天立地之人
將相公侯蓋亦有命射御書數皆謂之文 若知者

行其所無事故君子名之必可言 坐榻橫書升臺校
射然香品畫對月開尊 武將宣威自天而下文臣紀
盛如日之升 瞻言古人便若同世措置難事亦如平
時 揆高度深九數所極指事會意六書之綱 天爵
在身無官自貴異書滿室其富莫京 力排異端將軍
破賊心存天理行子還家 見人之過如已有失於禮
既得卽心所安 力排衆論乃見獨是心師古人自爲
一家 習八分書得陝本貴存百家目自隋志傳 尺
書可當十部從事名作便是五言長城 就已然情知

未來事於獨居地見大衆心 有功不伐聞過則喜爲
道日損積德能升 縱橫百家才大如海安坐一室意
古於天 天爵崇高初無階級書城割據各異門塗
意之所忽過從此長衆有同欲功不可居 聖業顏曾
清名李郭相才文富士品裴王 參三六九易數皇極
斯寓合百二十國書魯史乃興 何必開門明月自然
來入室不須會友古人無數是同心 戴聖祖高堂士
禮從知家相作子長事安國尙書眞見古文來 士禮
守容臺本東魯兩聖人所定佛書破藏海是南朝衆才

子之文 明理自平居莫到有事時存兩端念置身須
得地當爲從古來第一等人 行路有何難我曾從天
柱九疑終南紫閣太室三塗直到上京王者地得師真
不易所願與高堂二戴安國子長相如正則同依東魯
聖人家

明季大臣

明季大臣率多庸劣可笑如桐城人給事中孫晉遇樞
臣張鳳翼於朝房自言其鄉恐權寇鳳翼曰公南人何
憂賊起西北不食南米賊馬不餉江南草間者粲然皆

笑又秦撫甘學闊駭不解事賊至不遣兵手記下都虞
侯縛治左右給以親往則緩服盛輿從逐之薄暮宿一
堡聞人馬聲其下將棄之去前驅傳曰督師來相見愕
眙告以賊難扼輒怖急還走紇城門以紙張謹錄鎗牡
不敢張目視又熊文燦督師之受事也神志恬悅自失
疏言臣至蘄黃見被賊近一歲而野有雞鶩倉有稻粱
沿江饒給盜之招也若盡遷民與粟閉之城中俾賊無
所掠當自退中朝見者無不哂笑又豫撫常道立持軍
不整饋遺供頓邑索千金久駐襄城陽言遮捍惟許實

貪其無賊有殿軍未盡候者傳曰賊至懼而顛左右掖
之始上奔避民舍兩齒相擊又楊嗣昌代熊文燦爲督
使其上彝陵討賊也駐彝陵一片不進取華嚴經第四
卷謂可詛蝗已旱公然下教郡邑且以上聞當時朝廷
用此等人掌兵國事安得不壞

四書逸箋

應城程是菴進士大中四書逸箋援據精博有足補集
注所未備且有足正集注所未及者摘錄以資參考東
帶說字云在腰爲腰帶在胸爲束帶腰帶低緩束帶高

緊公西華東帶立朝蓋當有事之際倉卒立談可以服

強隣卽折衝尊俎之間意泛作禮服非賓客周禮注

大曰賓小曰客爲君臣之別民食喪祭何晏集解引

孔氏注重民國之本也重食民之命也重喪所以盡哀

重祭所以致敬吾豈匏瓜節孔注匏瓜得繫一處者

不食故也吾自食物當東西南北不得如不食之物繫

帶一處菜竹孔穎達疏菜王芻也

本爾雅竹蕭竹也

正鵠皆鳥名鵠小而飛疾大射禮鄭注正齊魯之間謂

之題肩皆鳥之捷黠者射之難中取以爲的宗器鄭

氏注祭器也 華嶽華山名嶽亦山名周禮豫州山鎮

曰華雍州山鎮曰嶽爾雅釋山云河南曰華河西曰嶽

舉二山與下二水對 廣澤獸陰鹿山獸陽 寡妻趙

注寡少也嫡妻惟一故曰寡 鼓樂趙注鼓樂者樂以

鼓爲節也 麒麟二獸名郭璞云麒麟似麟無角詩疏麟

黃色一角角端有肉作一獸誤 乘屋趙氏謂乘蓋其

野外之屋蓋爲田事計宜豫完其在田之宅若邑居之

屋已入而處之矣 徙趙注受田易居也蓋井田之法

不受田則不易居無輕徙者 大略趙注略要也言井

田未及其詳已舉其要大要者大事之要也潤澤其餘
事耳 詭遇橫而射之曰詭遇 今茲茲年也今茲猶
今年也 營窟二字各一義禮運注營者營累其土於
地上窟者窟穴於地中 市井古者因井爲市故曰市
井 南陽山南曰陽岱山之南謂之南陽疏云岱山卽
太山在齊之南四書備考引南陽府之南陽縣誤 黎
民黎本訓衆又訓慮此當訓衆蓋言五十七十衣帛食
肉其餘衆民亦不饑不寒 君子之澤新鄭高氏曰澤
謂容貌色澤猶禮云手澤曰澤也蓋五世之內其人雖

不可見見其人者猶有存焉其形容音響尙有稱述之者至於五世見其人者亦皆已歿而形容音響不復可知若君子之流風餘韻雖百世可也五世安得遂斬邱民趙注邱十六井也邱民謂邱間之民得乎邱田之民便可爲天子猶有田一成有衆一旅之意

小詞長調

作小詞貴含蓄言盡意不盡韓南澗霜天曉角采石蛾眉亭云倚天絕壁直下江千尺天際兩蛾橫黛愁與恨幾時極暮潮風正急酒闌聞塞笛試問謫仙何處青

山外遠烟碧作長調貴曲折而清空一氣王沂孫摸魚
兒云洗芳林夜來風雨匆匆還送春去方纔送得春歸
了那又送君南浦君聽取怕此際春歸也過吳中路君
行到處便快折湖邊千條翠柳爲我繫春住 春還往
休索吟春伴侶殘花今已塵土姑蘇臺下烟波遠西子
近來何許能喚否又恐怕殘春到了無憑據煩君妙語
更爲我將春連花帶柳寫入翠箋句二作各極其妙

彭澤父

明兵部尙書彭澤守徽州將遣女治漆器數十使吏送

其家澤父大怒趣焚之徒步詣徽澤驚出逐日吏負其
裝父怒曰吾負此數千里汝不能負數武耶旣入杖澤
堂下杖已持裝徑去澤益痛砥礪歷著政聲此事大有
古風按吾邑李臨川先生樂見聞雜記載一事亦與此
同壽光劉文和公瑒致政家居封翁尙在一日文和他
出乘轎歸第封翁偁同客在門文和不知引避封翁盛
怒欲杖之客不能解竟以轎杠加責此等家法豈易有
耶

歐陽公七律

歐陽公七律卓鍊警健處令人百誦不厭如唐宗微公
主手痕詩云玉顏日占爲身累肉食何人與國謀上杜
相公云貌先年老因憂國事與心違始乞身此最著稱
於後世者餘若萬馬不嘶聽號令諸蕃無事樂耕耘寄秦
州田朝廷失士有司恥貧賤不憂君子難送王平甫下第亦調
元均高響逸東坡才氣雖大若論風格恐猶遜一籌耳

夜紡授經圖

嘉興錢文端公陳羣之母南樓老人善繪事公會進畫
冊於

高宗純皇帝題詩卷首并題清芬世守四字公幼時父
省親於信安南樓老人授公兄弟經夜必篝燈課讀以
其餘輝躬自紡績後三十年公奉母於京師寫夜紡授
經圖題詩云母兮兒飢終朝誦讀不可以爲粟母兮兒
寒終夜呶呶不可以爲衣解一秋夜長秋月白母曰嗟汝

父行役兒不學我廢績廢績婦所羞不學人所惜紬之

釋之永今夕誰予和鳴促織

解二

促織鳴絡繹聲析上衣

手中絲手中絲槃中餐兒母啼飢兒母號寒爲誦孟子

終七篇

解三

昔孟有母恃子實怙汝今不勤學吾何見汝

父他日父歸行見撻汝撻汝猶可毋棄先人緒譬厥紡
千萬縷一失理紛莫數思之思之淚下如雨四解兒踞膝
下將母勿怒兒請卒業然後寢處奇文難字母訓母詰
英聲華詞是獵是咀母曰樂哉天實助予聖賢在上實
聞此語五後解

高宗純皇帝閱公香樹齋集見其詩

特賜題二絕句云篝燈課讀澹安貧義紡經鋤忘苦辛
家學白陽譜繪事成圖底事待他人五鼎兒誠慰母貧
吟詩不覺鼻含辛嘉禾欲續賢媛傳不愧當年畫荻人

公復乞當代名公題咏成軸其孫潤齋中丞臻因索觀者衆慮其致損乃摹勒於石恭和

御韻題詩於後有願將世守清芬句凜誦王言勵後人之句

西湖秋柳詞

歸安楊秋室明經鳳苞博雅邁倫屢試不得志賦西湖秋柳詞以寄意前後積七十二首情味並勝於西湖竹枝詞外別開詩境摘錄於左以擬窺豹一斑云回首東風十萬條畫樓亞處關纖腰香車去後游驄散閒殺紅

闌第四橋玉鈎簾幕自年年紅粉飄零更惘然惆悵披
香秋色好無人曉起聽涼蟬會芳故苑最魂銷花月當
時妒細腰悽斷御溝流水外髻雅歸去認前朝霏霏涼
露溼池臺太息芳年去不同記取總宜園內樹也愁天
外鴈聲來芙蓉吹墮謝家船隄樹重攀又六年自與秋
槐共零落行人愁蹋故宮煙露條煙葉漸闌珊翠館人
歸夜正寒月落平湖秋色遠夢回幾度捲簾看

明登科錄

明洪武四年登科錄一甲三名二甲十七名三甲一百

各一甲一名吳伯宗授禮部員外郎一甲二名三名及
二甲皆授主事三甲皆授縣丞浙江中式三十一名杭
州二明州五紹興十一金華一嚴州一温州二台州八
處州一嘉興湖州衢州三府皆無其籍貫有民籍儒籍
軍籍站籍之分是科二月十九日殿試二月二十日卽
張掛黃榜宣諭除授職名

鴛水聯吟

道光戊戌秋嘉興所餘三茂才鴻慶與其友數輩結鴛
湖詩社每歲四集分題後限期收卷乞名流評定甲乙

前五名皆有酬贈事歷三秋編成十集擇其尤者付梓
名曰鴛水聯吟摘錄絕句數首以當嘗鼎一臠子夜冬
歌云窗前種天竹歡來發幾枝采之當紅豆一粒一相
思海鹽黃韻珊憲清寄郎尺素書呵凍字不成更有棋

糊處淚與墨交并

屏書黃

松孫

憶郎去遠道獨自

高樓憑郎意飛作雪妾心結成冰

秀水孫嘯巖

十國

春秋吳越雜事詩云褒功恩禮冠當時試讀煌煌鐵券
辭孤負江東明大義不曾一討五經兒

秀水于秋沱源

一字褒譏屬史官橫征事合子虛看廬陵千古如椽筆

尙覺文章公道難

孫淵

夏日圃居雜興云紫茄白苧影

參差一徑濃陰月上時竹榻夜涼詩夢醒莎雞啼出豆

花籬

平湖賈

敦艮

送燕云玉娘湖畔草萋萋王謝

亭臺路已迷惟有雕梁舊時月隨君直度海雲西

海鹽

吳彥宜延燮

弔腳痧

弔腳痧證至速服藥不及必先外治急用糟燒一大碗
燙熱入斑貓未攪勻乘熱熨四肢數人用手連拍之冷
則更易熨至小便通轉筋自止再飲煎藥可以獲痊此

方同邑張雨杉茂才光裕所傳云其親歷療治多人世
俗所傳之方僅用燒酒無此神應

蔡浣霞先生

吾邑蔡浣霞先生鑒揚由儀曹出知延平府風雅好詩
公事之暇於署中大觀樓集同人及其子伯翼離尹鴻
恩季成少尹鴻憲爲詩社更唱迭和佳什甚多摘錄數
首於左囀噴曲云四面安帆幅南鄉定北鄉黃河凡九
曲曲曲是迴腸石魚不上水銅鳥不轉風琵琶曾暗
卜只在九江中浣霞幾卜金錢信思君別淚多雙懸明

月鏡分影照脩城

伯翼

盤杏云迷迭長繫恨兜婁欲悟

禪累雲金塔小印月玉環圓蠡甲風氣合螺文宛轉連

相思灰一寸心字亦迴旋

游雷

游仙云十二層樓紫玉

簫聞風西角綵雲飄紅墻有恨難通月碧海無情易上

潮殿上不知方朔貴窻中但倚阿環嬌七臺真錄依稀

在重註黃金字半銷

浣霞

彩鸞招我到蓬瀛姪女瑤妃

一笑迎五岳真形杯底隱十洲新記袖中成靈田草長

呼龍種小海書回附鶴行曾記瑤臺扶夢起入門應識

許飛瓊

伯翼

雲飛大綬紫羅裳歸去三臺夜未央珠袖

迴風鬻尾瘦玉笙吹月鶴翎涼笑傳宮拍雙聲引醉乞
天厨九醞方雲笈內篇仍背錄桃花何事誤劉郎

季成

羊車

周禮考工記羊車註謂羊善也若今之定張車疏謂漢
世去今久遠亦未知定張車將何所用但知在宮內所
用故差小爲之謂之羊車也釋名羊車羊祥也祥善也
善飾之車今犢車是也隋禮儀志羊車小兒數人引之
漢代或一人牽或駕果下馬梁貴賤通得乘之名曰牽
子是羊車未嘗駕羊也南史宋文帝潘淑妃傳帝好乘

羊車經諸房淑妃密令左右以鹹水灑地帝每去戶羊輒舐地不去羊車駕羊始見於此晉書胡貴嬪傳亦言以鹽汁灑地引羊車

特不言

羊舐地

浙西要害

宋王仲言玉照新志載其父性之於建炎已酉春上浙西帥康允之書乞備西境言極激切是冬敵騎果至取道之境悉如所言今觀其書切中浙西要害特錄之杭州在唐繁雄不及姑蘇會稽因錢氏建國始盛請以其西境言之北有常潤下連大江浙西觀察使治所在京

口蓋相距數百里形勢也其東滄溟離海山際天風濤
豪壯然海門中流至淺狹不可浮大舟匪夷狄能窺其
南則浙江以限吳越惟州西境無大山長川虛怯可虞
錢鏐始因宣歙羣盜米直曹師雄作亂自鄉里起兵保
有臨安至敗黃巢於八百里威名益振遂分建八都於
兩境精兵各千人互相策應新城縣聖安都杜稜守之
富陽縣靜江都聞人宇守之臨安縣石鏡都董昌守之
餘杭縣龍泉都凌大舉守之鹽官縣海昌都則徐友及
北關鎮則劉孟容臨平鎮則曹信浙江鎮則阮結又置

都知兵馬寨於龍泉臨安以爲援建八都堂於府第日
與幕賓聚議至建霸府也累世皆大興寺於西湖匪特
祈福爲觀美而已實據諸峯之險爲候望也結婚宜欵
節度使田頴倚角以備江南李氏蓋錢鏐本臨安人又
立功起於西境故知此形勢爲盡惟能保其西境由今
觀之今昔雖異利害一同自餘杭龍泉無五十里地名
霍山平路如砥可徑抵城下龍泉拒安吉廣德甚邇今
日議者惟於蘇潤二州置帥宿兵不知西境乃先務也
某愚憊過計萬一敵騎過江金陵不可攻豕突直抵安

吉廣德以搖錢塘則數百里響動是邦危矣伏望台慈
察一方之利害從邦人之至願考入都舊迹別行措置
聞諸朝廷使金陵宣歙與我相爲表裏出兵據險守要
事無不濟餘杭臨安兩邑土豪比諸縣最爲驍銳擇其
守令例假一官以鼓舞之使扼其要路逾於金湯之固
矣順亭林天下郡國利病書兼及守
禦之策獨遺此書故備誌於此